

Dana 28.03.2011. godine u prostorijama ASA- Holding u Sarajevu je održana 10. redovna Izvještajna Skupština Udruženja poslodavaca Federacije BiH. Na dnevnom redu Skupštine su razmatrani Izvještaji o radu UO UPFBiH, Izvještaj o radu delegacije ESV-a, Finansijski izvještaj Udruženja za 2011.godinu, kao i prijedlog Programa rada i Finansijski plan udruženja za ovu godinu.

Skupštini su prisustvovali preko 50 najuspješnijih kompanija iz FBiH koji su prisutne goste predstavnike izvršne i zakonodavne vlasti upoznali sa problemima sa kojima se susreću u praksi.

Skupštini su pored članova Skupštine prisustvovali i predsjednik Saveza samostalnih sindikata BiH Ismet Bajramović, visoki predstavnik u BiH Valentin Inzko, zamjenik federalnog premijera Jerko Ivanković Lijanović, Predsjedavajući Predstavničkog doma Parlamenta FBiH Denis Zvizdić te predstavnici komora i drugih institucija sa kojima Udruženje usko saraduje.

Na početku Skupštine, prisutnim poslodavcima obratio se NJ. E. Visoki predstavnik za BiH Valentin Inzko koji je istakao da poslodavci imaju najveći interes da apeliraju na političare da riješe probleme u BiH.

"Povjerenje je ono što je ključno u biznisu i političari bi se mogli ugledati na biznismene", rekao je Inzko.

Prema njegovim riječima, privrednici u BiH rade u teškim uvjetima, zemlja još nema zakon o obligacionim odnosima, što otvara prostor za birokratiju i konfuziju, još nema jedinstvenog tržišta, pa su privrednici prinuđeni raditi na malim i neprofitabilnim tržištima, a nepovoljno poslovno okruženje rezultira gubitkom investicija. Dalje je istakao je da u BiH mora biti riješen niz problema poput kreiranja jedinstvenog ekonomskog tržišta te nedostatak ekonomskog lobiranja za investicije u BiH.

"BiH i njene institucije moraju biti fokusirani prvenstveno na ekonomiju i pravnu državu", rekao je Inzko.

Članove Skupštine je pozdravio i Ismet Bajramović koji je istakao da je cilj Sindikata da doprinese poboljšanju poslovne klime u BiH kako bi se konačno prekinulo otpuštanje radnika i počeli ljudi zapošljavati.

Poslodavcima se obratio i zamjenik premijera Federacije BiH Jerko Ivanković koji je ponudio pomoć poslodavcima ističući da će Vlada FBiH biti na usluzi poslovnom sektoru.

"Mi već pregovaramo o ukidanju doprinosa na plaće u proizvodnji, a u narednom periodu pokušat ćemo osigurati i svjež kapital te intenzivno raditi na promjeni vanjskotrgovinske politike kao i porezne politike", dodao je Ivanković.

Predsjedavajući Predstavničkog doma Parlamenta Federacije BiH Denis Zvizdić stava je da je neophodno napraviti temeljnu analizu postojećih strategija i zakona te pozvao poslodavce da se intenzivno uključe u ovaj proces.

Nakon obraćanja gostiju i diskusije poslodavaca koji su u svom obraćanju gostima istakli najveće probleme sa kojima se susreću Skupština je razmatrala materijale koji su se nalazili na dnevnom redu.

Izveštaj o radu UO UPFBiH je ocijenjen izuzetno visoko. U izvještaju o radu je posebno naglašen rad Stručne službe koja je dala ogroman doprinos i uradila veliki dio posla u radu UPFBiH. Također je istaknut i rad delegacije ESV-a koja je aktivno učestvovala kako u pripremama materijala tako i u samom radu na sjednicama ESV-a. Dalje, u Izvještaju je naglašena bolja saradnju sa sredstvima javnog informisanja od kojih je UPFBiH imalo podršku u aktivnostima.

Skupština je ocijenila da Program rada UPFBiH previše ambiciozan, ali da ukoliko Udruženje želi napredovati i ostvariti ciljeve Program rad mora biti ambicozan. U programu rada je istaknuto da UPFBiH očekuje i dalje aktivan rad ESV-a a posebno aktivan rad od strane Vlade FBiH kao jednog od socijalnih partnera budući da je do sada nedostajala aktivnost Vlade FBiH za razliku od druga dva socijalna partnera koji su dali izuzetan doprinos.

Kroz finansijski plan moglo se uočiti da će u narednom periodu budžet UPFBiH biti povećan kako bi se mogli angažovati i stručnjaci za analize i na taj način poboljšati rad Udruženja. .

Na Skupštini su također potvrđene i Odluke o imenovanju tri nova člana UO UPFBiH. Skupština je potvrdila imenovanje Franje Milosa (Hous Milos doo) , Ante Sutona (Suton doo) i Harisa Kuskunovića (Merkator doo).

Obzirom da je mandat Predsjednika Skupštine i dva zamjenika predsjednika Skupštine 1 godinu, Skupština je reimenovala Predsjednika i dva zamjenika predsjednika Skupštine.